

Kulturikkut ilisarineqarnerunissarput anguniarlugu arnanut angutinullu inuiattut assuutitta nunarsuarmi assuutit kusanarnersaattut saqqumilaartittarnissaat siuarsarniarlugu inuiattullu assuutinik suliarinnittarnerup ineriartortinneqarnissaat pillugit apeqquteqaat aallaavigalugu oqallinnissamik siunnersuut.

(Inatsisartunut ilaasorta q Ruth Heilmann, Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Nunatta nittarsaanneqarnissaata kulturittalu sulinermi tamatumani ilaatinneqarnissaata pingaaruteqarnera Naalakkersuisut isumaqatigaat.

Kulturimik suliallit inuussutissarsiortullu nittarsaariaatsinut eqqumiitsuliornermullu ataqqeqatigiillutik qanimut suleqatigiinnerat tunngaviusariaqarpoq, sulineq tamanna iluatsillu-assappat. Taamatut suleqatigiilernissamik isumalioqqinnerit ataatsimiittarfimmi matumani imm. 48-p siullermeerneqarnerani eqqartorneqarput aappassaaneerinninnermilu, kiisalu misigisas-sarsiortitsinermik inuussutissarsiuteqarneq pillugu nassuiaammi nangeqqinneqassallutik.

Kalaallisuut Inatsisartuni, assersuutigalugulu inuusuttut akornanni soqutigineqartorujussuuneri Naalakkersuisut nuannaarutigaa. Kalaallisuut ilaqutariinni kalaaliusuni pisuni annerusuni atorineqartarput, taamatullu aamma nunatsinni maani nunanilu allani ilassinninnikkut suliasani annerusuni atorineqakkajuttarlutik.

Kalaallisuuliortarnermut tunngatillugu ukioq kingulleq ukiakkut ataatsimiinnermi allaaserineqartutut ungasinnerusoq eqqarsaatigalugu misilittakkat siunissami Atisaliornermut Ilinniarfissami tunngavilerneqarnissaat suli siunertaavoq. Tassani ilinniartitaanermi immikkut ilisimasatut atisaliornermillu Ilinniartitaanerup saniatigut pikkorissaatitut kalaallisuunik suliaqartarnissaq periarfissaassaaq. Ilinniarfimmi nunattaluunniit ilaani, ass. najukkani amernik mersortarfinni sumiiffinniluunniit assigisaanni atorussaqarfioreersuni pikkorissaasarnissaq isumaavoq, immaqaj najukkani suleriaatsinik taakkuninnga ilisimannittunik suleqateqarluni.

Atisaliornermut Ilinniarfiup ilaata 2010-mi aallartinnissaa Naalakkersuisut ilisimatitsisutigisinnaavaat, tassami pikkorissartitsinernik arlalinnik ilisimasanillu katersuinernek aallartittoqassamat siunissami atisaliornermik ilinniartitaanermut ilaasussanik. Pikkorissartitsinerit ilisimasanillu katersuinerit ukiuni 2010, 2011 aamma 2012-imi pissapput. Qangaaniilli assarnikkut eqqumiitsulioriaatsimik, ilaatigut kalaallisuuliornermik ammerinermillu suliaqarnermi immikkut pikkorissartitsisarnissaq Naalakkersuisunit suliniutiginearpoq. Tamatumunnga atatillugu ingerlatat ilaatigut tassaassapput ilisimasatoqqat piffissaagallartillugu ingerlateqqinniarlugit immikkut pikkorissartitsinerit, ilaatigullu tassaassallutik ilisimasanik katersuinerit siunissami Atisaliornermik Ilinniarfimmu ilaasussat. Immikkut kiffartuussinissamik isumaqatigiissut Knud Rasmussenip Højskolianik isumaqatigiissutigineqartussa q naapertorlugu pikkorissartitsisarnissaq isumaliutigineqarpoq. Ukiullu pingasut taakku ingerlanerini tamatumunnga peqatigitillugu Atisaliornermik

Ilinniarfissamut 2013-imi aallartinneqassanga-tinneqartumut atugassanik ilisimasanik atortussanillu nuna tamakkerlugu katersuisoqassaaq.

Atuarfimmi atuartitsissutit sumiiffinni ataasiakkaani toqqagassat ass. assassorluni eqqumiitsulianik assigiinngitsunik suliaqarneq ilanngunneqarsinnaavoq, atuarfiup tiimit taakku imassai nammineq aalajangiiffigisussaammagit.

Akissuteqaat Inuussutissarsiornermut Naalackersuisoqarfimmut, Aningaasaqarnermut Naalackersuisoqarfimmut, kiisalu Nunanut allanut Pisortaqarfimmut tusarniaassutigineqareerpoq. Tusarniaanermut akissutit ilanngunneqarput.

Taamatut oqaaseqarluta ataatsimiittarfimmi isumassarsiorfiusumik oqallilluarnissaq neriutigaarput.